

王雲五主持

續修四庫全書提要

臺灣商務印書館發行

撫順縣志略不分卷 宣統三年石印本

知縣程廷恒修。廷恒字守初。江蘇崑山人。由附貢生宣統二年二月任。以撫順本爲承德興京附屬之地。設治未及四年。前迹已渺。無可稽徵。前任趙宇航爲撫順知縣時。即搜討故實。編輯成書。廷恒繼趙之後。乃以餘暇從事摭拾。遂成撫順縣志略一部。全書不分卷。其體例依通志略之例。立建置。官制。氏族。宗教。風俗。勝蹟。人物七略。以錄其實。又依史記年表之例。立經緯氣候。疆域。山川。籍業。村屯。戶口。居留。歲出歲入。貨幣。警察分區及官弁。司法比較。學校。礦產。交通。物產十五表以導其源。其風俗。勝蹟。人物三略。本擬刪除。繼思此三篇。乃人民之智識與古今之興亡所係。因姑存之。是志體例。雖不符地志。然追仿史漢。尙能自創。不襲舊編。實有足多。惟只有表。略不列志。傳。遺漏亦所不免。而書中敘述。備見亦多。均是志之瑕疵歟。

遼陽縣志四十卷 民國十六年鉛印本

知縣裴煥星等修。白永貞等纂。煥星由拔貢知遼陽縣事。以康熙二十年遼陽知州楊鍾離會創修遼陽州志。但至今已不可得。欲觀風知政。索閱縣志。僅檢得鄉土志一卷。正擬修纂。適值省憲通令重纂邑乘。乃邀奉天省議會議長。前代理省長白永貞爲編纂。因鄉土志即永貞所輯也。惟遼陽邑志。自康熙時修後。已數百年。時遠事湮。文獻無存。後搜得州志草稿一部。以爲依據。閱六月而草創成。共爲六編。凡四十卷。

是志以鄉土志及舊志爲藍本。所取材凡康熙以前事蹟。以全史。三通。大清一統志。盛京通志爲準。康熙以後。兼取東華錄。名臣傳。及各家著作。全書分地理。人物。政治。人事。物產。藝文。下附細目。地理志下分建置沿革。山川。城池。公廨。區村。壇廟。古蹟。人物志下。分名宦。勳舊。鄉宦。選舉。鄉型。孝義。義舉。文學。烈女。流寓。政治志下。分行政。職官。教育。財賦。兵事。警察。自治。人事志下。分人類。禮俗。宗教。實業。物產志下。分植物。動物。礦物。藝文志下。分詔疏。序記。論辨。雜著。廟碑。碑銘。墓志。祭文。家傳行述。詩賦。軼聞。每門之前。皆有小序。是志體例甚備。敘述亦詳。惟自乾隆以後。以至光緒庚子。幾經兵燹。縣中文獻。強半無徵。雖取他志或群籍增補。而仍不免疏漏。實是志之遺憾也。

遼陽鄉土記二卷 鉛印本

清光緒三十四年。永貞撰。永貞字儼斯。遼陽人。候選直隸州州判。其書擬志書例。而駁雜不倫。歷代沿革政績兵事書。大抵出自盛京通志。宗教實業物產商務。則據當日吏牘。故言古事不可盡取。言近事則尙有可徵。如光緒三十年日俄之役。遼陽爲俄軍最後陣線。敘述俄軍防禦之事甚詳。是書之成未久。諒亦爲永貞所目驗者歟。

海城縣志不分卷 宣統元年鉛印本

知縣管鳳麟修。邑紳張文藻等纂。鳳麟字洛生。武進人。光緒三十二年任。按海城設治未久。舊無邑志。鳳麟宰斯邑後。始詔鄉士大夫各輯所聞。以備輯錄。收集既衆。旋成海城縣志。其書不分卷。內分歷史。地理。政治。物產。實業。交通。學制。風俗。宗教。生活。諸門。下附細目甚繁。以縣境。縣城等附於歷史。形勢。縣治。水道等附於地理。官職。軍事等附於政治。植物。動物等附於物產。農業。商埠等附於實業。道路。郵政等附於交通。是志體例。極形蕪雜。卷首亦無目錄。凡例。所記各端多屬新政。以各表爲最精核。尤以貨物輸入輸出諸表爲佳。蓋一闕此。即可知是邑社會狀況。惟於歷史沿革考証甚略。則是書之缺點也。

開原縣志八卷

咸豐七年刻本

知縣全祿修。張金式等纂。全祿字廉齋。滿洲正紅旗人。由舉人咸豐六年任。以邑志雖創始於康熙十七年前令劉超凡。再修於乾隆五十六年前令明亮。皆輾轉傳鈔。未能刊印流行。故舊志胥歸散失。且迄今八十年。亦應增修而存文獻。適值盛京纂修通志。徧諭各縣補輯邑乘。祿乃集邑之紳士。遺地設局。網羅舊聞。取舊志爲依據。增其廢遺。正其錯誤。因之者什之七八。續之者什之二三。逾六月而稿成。卷首繪圖。立綱爲三。分卷爲八。以天文。地理。人事分編。首爲詔諭。次爲天文。下附星野。祥異。次爲地理。下附建置沿革。疆域。形勝。山川。城池。關隘。物產。古蹟。景物。次爲人事。下附公署。職官。學校。祀典。禮制。壇廟。選舉。兵防。驛站。民戶口。民田賦。風俗。名宦。人物。忠孝。節烈。流寓。仙釋。藝文。雜錄。是書體裁。多依前志。各類小序。亦多仍舊。其山川志較前略增。凡名稱之異。皆詳註。

於後。兵防志前未載。今特增入。賦役。風俗諸志。前志簡略。是志亦爲增補。蓋開原諸地。置邑未久。而是志記載甚詳。義例亦完備。可稱東志中之佼佼者。

開原縣志六卷 民國六年鉛印本

知縣章啓槐修。邑人趙家幹纂。啓槐字蔭三。江西人。由舉人民國三年任。自邑志自清咸豐六年前令全祿纂修後。距今又六十年。此六十年間。中經政變。制度典章之改易。政治人事之推移。日新月異。而縣史年久失修。不特掌故佚聞。散佚難稽。且舊志亦燬於兵燹。因商諸士紳。設局調查。以邑人趙家幹爲編輯。時經六月。書始告成。內分地理。建置。人事。人物。政治。藝文等六卷。下列細目。凡方域。城池。要塞。名勝之區。均繪詳圖。附列各卷。其地理志下。分地理。沿革。疆域。山水。交通。物產。古蹟。建置志下。分城池。官廳。祠廟。修築。商埠。關隘。人事志下。分種族。宗教。氏族。慈善。農業。商務。工業。兵事。禮俗。災異。外僑事略。雜錄。人物志下。分職官表。科第表。選舉表。名宦。鄉宦。將選。忠節。孝義。列女。儒林。文苑。方外。流寓。政治志下。分自治。行政。司法。監獄。戒煙。教育。警察。保衛團。田賦。財政。藝文志下。分文。詩。詞。是志記載。較之前志。殊爲詳備。其取材則多鈔之盛京通志。此書之長。在能因時勢之需。舊者仍之。新者增之。故其體裁與內容。博大而精審。使閱者讀其文。即可以遊其地也。

錦縣志略二十四卷 民國九年鉛印本

知縣王文藻修。文藻字容齋。北平人。由貢監民國五年任。按錦州府志。創始於康熙二十一年。劉源溥。而錦縣志亦修於康熙二十一年王奕會。文藻皆未之見。所見者只於盛京通志所引書目有錦州府志。故文藻以舊志既無可徵。而盛京通志所載皆乾隆五十年以前事。迄今三百餘年。官署裁改。卷冊散失。而自清至民國。政教沿革。今昔不同。乃集邑人謀重修邑志。依盛京通志例。越二年告成。共二十四卷。列十八門。曰地理。建置。職官。經政。教育。選舉。武備。財政。實業。交通。宦蹟。人物。禮俗。物產。宗教。慈善。藝文。志餘等。每一門中。各分子目。惟甚煩冗。是志體例。尙能因時制宜。如各志之首。皆冠以典義語論。是志以國體既變。凡舊志所載天章均分附於各門。是書雖爲草創。而於政治。禮俗之沿革。皆能記敘靡遺。足見其搜討之勤。每志前之小序。亦考証精核。所引群籍。均註出處。洵創修志中之佳本。

綏中縣志十八卷 民國十八年鉛印本

知縣文鑑修。邑拔貢范炳勳纂。字純如。京兆人。清時。由蔭生至度支部員外郎。民國十五年任綏中知縣。考綏中爲縣。建自清末。由齊遠州割大股河迤西地域。分興城臨榆南邑之區脫爲一縣。自設治以來。原無縣志。民國十五年秋。省令各縣修輯志書。鑑乃延邑中鴻儒。從事修纂。六閱月成書十八卷。是志因無前規。爰採新民。開原。奉化。錦縣等志之新例。詳參互訂。全書分天文。輿地。建置。交通。兵事。大事記。政治。實業。人事。人物。物產。藝文十門。下附細目甚繁。以星野。氣候等附於天文。以沿革。疆域。要塞。山川等附於輿地。以市鎮。廟宇。古蹟。名勝等附於建置。以鐵路。電報。郵政。航路等附於交通。以田賦。教育等附於政治。以農林鹽漁等附於實業。以種族。禮俗等附於人事。以職官。科第表

等附於人物。以動植物附於物產。以詩賦。諸藝等附於藝文。惟兵事大事記無子目。書中以風俗。禮制。種族附於人事。職官。選舉等附於人物。均覺未妥。每門之前。皆有小序。取材雖富。而太冗雜。尙有待於後之刪訂也。

西安縣志略十二卷 宣統三年石印本

清知縣雷飛鵬等修。段盛梓等纂。飛鵬其經歷籍貫皆不詳。按西安縣治。設於光緒二十八年。建置未久。故無縣志。然邑宰如孟憲彝於光緒三十二年。卽有書錄。三十四年王孝儀又討詢於邑紳段盛梓等。爲之訂纂。飛鵬宣統元年任。卽搜輯近事。從事增補。越一年書成。共十三卷。全書分建置。監獄。地形。戶籍。自治。財計。保衛。教育。實業。禮俗。敘志十一門。中附各表。皆非重要。是志體例。不類志乘。因其設治日淺。故無職官。選舉等門。按是志雖屬創作。義例亦殊簡陋。而書中記載。則尙精詳。蓋西安乃葉赫故墟。遠徵舊蹟。是志雖虛。博引群籍。考其沿革。所引書目。皆注出處。其翔瞻精核。直可追蹤正史。惟書中各表。皆無關輕重之事。且亦簡漏。徒占篇幅。深爲是書之病耳。

新民府志一冊 新民習藝所鉛印本

清宣統元年。知府管聲鐸撰。新民始爲一荒村。人煙聚集而成市鎮。乾隆初。有巡檢來駐。因名曰屯。嘉慶十三年。分承德廣寧二縣置州。光緒二十八年。改升爲府。地方設置未久。文獻無徵。是志之編。實爲

創舉。其目凡二十。沿革。疆域。道里。航路。山川。戶口。村鎮。職業。居留。衙署。巡警。衛生。教育。司法。監獄。歲入。歲出。實業。貨幣。交通。體製。蕪雜。考証亦疎。如謂新民在漢曰揭婁。在晉曰百濟。在唐曰渤海。在宋曰拂涅。不知揭婁拂涅。始終在今吉林。百濟渤海亦未至新民。匪特未據史籍參証。且于通志亦未嘗檢閱。可謂陋矣。

昌圖府志一冊

奉天圖書印刷所石印本

清宣統二年。洪汝冲撰。汝冲以己酉歲來知府事。值軍部徵索志書。乃與屬員草定例目。蒐集報告而成。是書第一章疆土志。第二章政治志。第三章實業志。第四章交通志。第五章風俗志。第六章人物志。每章之內。各分子目若干條。名目靡羅。先後失序。如風俗志分普通習慣。市井習慣。士紳習慣。而又有所謂訴訟習慣。儲蓄習慣。如此分類。則人事萬端。舉凡一切事物。無不各成其類矣。至以學校宗教善舉祀典入政治志。已屬不倫。又以氣候災祥入疆土志。則更張冠李戴矣。

安圖縣志六卷

宣統二年抄本

知縣劉建封修。吳亞元纂。建封經歷皆不詳。是志首載建封序一篇。述設治與纂志之經過。謂奉督紳札飭。設治安圖。調查逾年。凡山川。道。路。土物。風俗。以及社會情況。皆躬親目驗。繼又履奉憲令。命編志乘。因博訪周咨。惟建圖日淺。地廣人稀。不特無書可稽。且無新事可采。乃邀山左名士吳亞元。徵志

負編纂之任。閱十有四月。書始粗成。自卷首以下。繪圖七。列表八。考之類七。志之類十有二。傳之類七。記之類八。略之類二。而以備考附於卷末。都五十二目。釐爲六卷。其卷首爲恭紀。卽聖蹟。聖武。聖訓。聖諭。卷一圖七。爲區域圖。衙署圖。長白山圖。長白山神祠圖。右勒湖里圖。穆石圖。測候圖。表八。爲沿革表。道路表。山水表。部族表。會總表。戶口表。物產表。各國人遊歷姓名表。卷二考七。爲輿緯考。沿革考。區域考。長白山考。群山考。水考。物產考。卷三志十二。爲雜務志。食貨志。市區志。捐稅志。學堂志。巡警志。林政志。兵衛志。遷旗志。風俗志。紳僑志。卷四傳七。爲列傳。忠義傳。孝義傳。一行傳。流寓傳。列女傳。釋老傳。卷五記八。爲大事記。金匪記。歸化記。會防記。匪亂記。設治記。郵電記。路工記。卷六略二。爲藝文略。古蹟略。末附備考。是志雖爲創修。體裁甚備。其原稿改竄甚多。所署目錄亦與內容不符。故人多誤爲十卷。其敘述均極謹嚴。惟分門別類。殊嫌冗煩。而志與考之記載。重複亦多。尙有待於後來者之刪訂。然創始如此。亦不易矣。

奉化縣志十四卷 奉化縣衙刊本

清光緒十一年。陳文煒撰。文煒字見三。安州人。奉化光緒四年設縣治。民元以後改名黎樹。地屬蒙疆。風氣晚開。而向無志書。是書之編實爲始創。分類十三。曰志天時。曰志地里。曰志建置。曰志紀典。曰志勳職。曰志人物。曰志選舉。曰志兵賦。曰志物產。曰志藝文。曰志雜錄。曰補遺。曰志餘。其體例蓋師自陸機書壽縣志。稱志某。則出于臨榆縣志也。詳略有法。文筆亦頗不惡。然于志人物。則采同人事跡。志藝文則錄自己詩文。不免跡近標榜。志雜錄則抄襲通志。志補遺。復轉錄本書。掇瑣補肉。亦無贊

苦心矣。至謂馬韓辰韓弁韓。在今喀喇沁地。遼中京金北京路。當奉化境域。則考証乖舛矣。考三韓在漢魏時。止於朝鮮南境。其後新羅百濟。亦未得履其境。遼中京金北京路。謂在今喀喇沁地。尙屬近似。若以之當奉化境。則不免謬誤也。

寬甸縣志略二卷 奉天文和興石印本

民國四年。程廷恒撰。是書分目二十二。曰建置略。曰兵制略。曰地理略。曰古蹟略。曰人物略。曰風俗略。曰經緯方里表。曰疆域表。曰山川表。曰政績表。曰司法表。曰宗教表。曰學校社會表。曰歲入歲出表。曰自治表。曰戶口村屯表。曰巡警表。曰預警表。曰礦產表。曰郵遞表。曰祠廟表。曰物產表。大旨略於古代。而詳於當代。於志乘之中。別爲體例。意者周禮職方。不過如是。而後來踵事增華。昧其本歟。

吉林通志一百二十二卷

光緒十七年重修本

清長順監修。總輯李桂林。分輯楊同桂。桂林字子丹。臨榆人。翰林院編修。精於東省輿地者也。同桂字伯馨。官長春知府。熱於東省掌故者也。是書多出此二人之手。故蒐羅甚富。證義甚精。與熱河志。可稱雙璧焉。先是乾隆元年。奉天府丞王河。纂盛京通志三十二卷。四十八年。又敦撰盛京通志一百二十卷。皆以盛京爲主。吉林黑龍江特從附載。詳此略彼。勢使然也。道光四年。吉林將軍衙門堂主事薩英額。撰吉林外紀十卷。體例蕪雜。考證亦疎。十七年。長順因奏請編修專志。例仿盛京通志。而稍有損益。其目

凡十三。統名以志。不立雜目。曰聖訓。曰天章。曰大事。曰沿革。皆無子目。曰輿地。曰食貨。曰經制。曰學校。曰武備。曰職官。曰人物。曰金石。曰志餘。每目下又各分子目。表散歸各類。圖附於後。條舉件繫。甚得體要。人物志。援據冊籍旁徵金石。可以補正史傳者甚多。於金源一代。尤見精采。余嘗檢對金史。其中十之四五。爲施國祁未及詳校。餘如沿革輿地。考證亦極精當。與因襲附會。開渠鑿空之志書。迥不侔也。然如大事志。止明成化。清初事蹟略而不詳。未免意有所諱。金石志。削大金陀羅。明代永寧寺女真字。而不錄。亦云未審矣。

吉林地志一冊

吉林印刷社鉛印本

民國二年。魏聲鰲撰。是書敘述以省垣爲中心。次西北。次東北。再次而南。秩序井然。有條不紊。吉林地名。類多沿襲舊稱。但以音訛音轉。動失其據。是書於每名之下。有音義可釋者。附釋其義。無音義可釋者。並列土名。遼金郡縣大類南北朝時代之簡置。滅國以後。輒移其民。而郡縣之名亦隨之。是書援引群籍。分條考訂。頗得其要。前人論古代輿地。僅據舊有文獻。互爲因襲。是書根據實地探查。與夫官署報告。考訂極確。曹氏輿地圖說以後。當以此爲傑作也。

樺川縣志六卷

鉛印本

民國十六年。唐純禮撰。樺川當松花中游。土壤肥沃。初屬三姓副都統管轄。宣統二年。開爲縣治。地處

邊陲。典章未備。是志之編。一無憑藉。體例無難。證義不精。豈偶然哉。其目凡二十八。曰大事。曰沿革。曰輿地。曰交通。曰實業。曰物產。曰建置。曰職官。曰行政司法。曰選舉。曰自治。曰教育。曰禮樂。曰軍警。曰兵事。曰田賦。曰財政。曰度支。曰貨幣。曰殖民。曰風俗。曰宗教。曰慈善。曰衛生。曰人物。曰古蹟。曰金石。曰藝文。名目繁雜。無非強求賅備之過耳。大事雜抄諸史。誤謬最多。如遼史興宗紀。重熙六年。詔罷五國會館。以節度使領之。而誤爲聖宗太平六年事。重熙十七年。以耶律義先。夏行美。耶律求者。伐朮里舍陶得里。而誤置聖宗太平年號下。至謂女真字爲滿文所本。亦屬臆度。女真字除筆夷譯語所載。近年出土者甚多。其形製與漢字相近。與遼文亦彷彿。獨與滿文大相逕庭。蓋女真字仿自遼漢文。金史希尹傳所載頗詳。滿文則以蒙古字母聯綴而成。復加以圈點。故女真字與滿文音讀雖同。其形體則迥異也。近年所編地志。大多于古事考核不精。上漏者抄輯通志。而排比之。下漏者。並於通志亦不檢對。按其語氣。此或抄自金氏黑龍江備志。或綱要。亦未可知。然亦有可取者。如金石志。於出土簡牘。製成圖版。形形色色。宛若親睹。尺度若干。出自何地。一一表而明之。考古者便於取實焉。全境地圖。雖非據最新法繪製。然由實地筆錄。自可徵信。山川。道路。地質。形勢。則據實地探測。具見精確。凡例云。本志編述純出調查。其一稿或二三見者。言人人殊。亦必集衆討論。其用力之勤。可概見矣。

雞林舊聞錄三卷 吉林印刷社鉛印本

民國二年。魏聲解撰。聲解字劭卿。江蘇武進人。旅居吉林二十餘年。見聞頗廣。又精于東省輿地。所著

吉林地志已著錄。是編之成。半由各地所採訪。半由平昔所親聞。其所取材。每爲外間所罕見。如金會寧寶勝寺碑。豐城子寬永年號碑。皆爲通志所不載。朱三太子疑案。至今未決。聲辭從新城得一抄本曰張先生傳。爲步方遠撰。可與故宮檔案中之步方遠供狀。參稽互證。然於某本雜誌。有山東流人王泉爲清德祖之語。而遼肅王泉爲順治生父。則亦不免爲狂說所誤矣。

長白彙徵錄八卷 鉛印本

清宣統元年。張鳳台撰。咸同以前。長白遙隸興京。光緒初年。徙屬通化。二十九年。改屬臨江。三十三年。升爲附治。是書分目凡九。曰疆域。曰山川。曰兵事。曰風俗。曰物產。曰藥品。曰文牘。曰雜識。曰古蹟。原名徵存錄。旋改彙徵錄。不名志者。以體例未備耳。其材料出自實地調查者。十之四五。援引古書者。十之二三。餘則抄自當日吏牘。非與因襲陳說者可比。如圖們江爲中韓天然國界。朔方備乘作徒門。水道提綱稱土們。聖武記稱圖們。韓人名曰豆滿。實一音之轉耳。而皇朝一統與國妄分大圖們小圖們。會典附會之。以大圖們源于長白東線。小圖們出自其北。遂釀成中韓邊界之爭。是書基于實測。考證此水源流支系。至爲詳盡。又如鴨綠江。吳兆騫寄古塔記。謂在寧古塔南門。瓦爾喀部。魏源聖武記。置于鴨綠江。是書窮源竟委。分條痛駁。一掃百數十年來之翳障。論東北與地者。不可不資於是書也。然於兵志。先清代而後歷朝。物產藥品則所爲二類。顛倒錯雜。異乎常例矣。至因牛加馬加。而詆三國後漢爲謬。陳壽范曄爲賊。則有失評人之體矣。

吉林外記十卷

漸西村舍叢刻本

清道光四年。薩英額撰。英額字吉夫。補州正黃旗蘇勒芳阿人。官吉林將軍衙門堂主事。是書大致抄撮盛京通志。兼及吏牘而成。卷一御製詩歌。卷二疆域形勝山川城池。卷三補州蒙古漢軍建國沿革。驛站船廠橋樑。卷四職官兵額。卷五俸餉事宜。卷六學校儒林文苑祠祀。卷七田賦物產公署人物。卷八時令風俗貞節雜記。卷九古蹟。卷十豐城堡伯都訥屯田。體例雖稍繁冗。而所記間爲他書所不及。如大金得勝陀碑。有漢文。並錄女真字。八角井古鏡。則述其掘得之由。通志于碑則略女真字。于鏡則略其實事。不及外紀多矣。夫清人發祥長白。而吉林向無專志。英額爬羅剔抉。哀然成帙。豈易事哉。

黑龍江通志綱要二冊

鉛印本

金梁撰。金梁久宦東省。熟於滿清掌故。長遼政時。嘗令各屬纂輯鄉土記。備續盛京通志。又以吉林通志。尙有所遺。每欲取而補輯之。民國九年。孫烈臣督黑。以江省通志事相屬。金氏乃設局北平。搜羅志材。成長編百五十冊。三百餘萬言。題曰黑龍江備志。以全書卷帙過繁。復師資治通鑑目錄例。錄其綱要二卷付梓。卽是書也。惟徵引雖富。證義甚疏。如漢武帝元朔元年所置蒼海郡。其地望在今朝鮮咸鏡。及吉林東邊。而誤指在江省。遼金製字。而謂江省民族有文字之始。不知女真發祥長白。契丹肇興熱河。江省雖係遼金境域。亦不得妄爲繫附。且前之突厥渤海。武力皆達江省。其文字之製作。斑斑可考。何不以此

爲據。而斷自遼金乎。

黑龍江志稿六十二卷 北平印本

民國二十一年。張伯英等撰。盛京吉林。於乾隆道光兩朝。先後成志。獨黑龍江。數百年來。無顯書。光緒間。北京會典館馳檄各省督修輿圖。江國總纂爲武進屠奇。原擬輿圖藏事。即以屠氏總纂通志。嗣以拳亂。俄軍進入。諸人星散。民初。朱慶瀾巡按斯土。復開局纂修。不二年。又因事中輟。六年孫烈臣督黑龍。以金梁主其事。乃設局北平。廣羅史料。越數年成書百五十冊。三百餘萬言。題曰黑龍江備志。惟體例未治。繁簡失當。萬福麟督黑時。又屬銅山張伯英等重編。迄二十一年六月。始藏事。數十年來。屢作屢輟。自是乃克告成。誠幸事也。是書分目凡十三。曰地理志。曰經政志。曰物產志。曰財賦志。曰學校志。曰武備志。曰交涉志。曰職官志。曰選舉志。曰人物志。曰藝文志。統名曰志。下分子目若干條。以簡御繁。體製頗爲整密。然如藝文志。雖采日俄著述。而反漏訥河郭克與黑龍江鄉土錄。人物志則摘抄史傳。而不仿吉林通志。鈎稽群籍。互爲訂正。至於蕭氏耶律奴妻。金源獨吉氏。尹氏完顏諸兒妻。禮之遼金二史。與江省並無任何關係。雖其餘可風。則亦不得妄爲攀附。序目云。若其郡望不明。範以方域。稍涉疑者。概不闕入。豈非先後自相矛盾乎。餘如地理志之建置。陸軍軍官。以檔案未在。調查義外。書圖有闕。既名志稿。則是書尙待更續耳。惟交涉志尙稱詳確。非若他志雜抄前書。或當日史蹟。而緣飾附會者可比。乃鈎稽繁籍。甄綜排錄而成。遇有異文注入下方。間附考證。亦頗精審留心邊事者。所取微焉。

黑龍江外記八卷 漸西村舍叢刻本

清嘉慶十五年。西清撰。西清字研齋。文端公鄂爾琿曾孫。工詩文。刻有聚魁集。官黑龍江時。嘗檢署中舊檔。甄錄於冊。暇則訪問故老耆舊。心有所得。輒筆而記之。積久成書八卷。卷一山川形勢沿革。卷二城堡。台站。卡倫。卷三部落。種族。戶口。官制。兵制。卷四餉餉。錢糧。出入。款項。卷五貢品。風俗。刑律。互市。卷六調戍。方言。服食。卷七歷任職官。及流徙謫籍人物。卷八五穀。果蔬。物產。分門別類。頗有條理。特其足跡。未能全蹟周到。所記亦不無闕略。蕭穆。跋云。墨爾根布特哈以西外興安嶺山路。可通奇乾河墨河金廠。校之取道愛琿新城。溯江西上之水路爲徑捷。再進西踰嶺嶺古納河。接糧倉海圖之地。直掠外蒙古喀車臣汗之東界。亦產金沙。此一帶山脈。國語謂之金阿林。又江左岸之愛琿河精奇里。雅克薩城。地勢遼闊。五體界碑。亦在境內。是記中皆不能詳。此言是也。然如尼布楚條約。平定疆利方略等書所載。皆五體碑文提要。辭句簡略。原委不明。此獨據滿文約章。信然可據。按康熙二十八年所立碑。爲滿蒙漢俄拉丁五體字。條約爲滿蒙俄拉丁四種文。今皆失傳。清總理衙門中俄約章會要。及日本最近極東外交史稿等書。所收皆碑文。惟外務部各朝條約所收。係約文。據云出自西清外記也。由是言之。則是書豈得以通常志書而論之耶。

黑龍江述略六卷 徐氏親自得齋校刊本

清光緒十五年·徐宗亮撰·宗亮字晦甫·號椒岑·安徽桐城人·父豐玉·殉節田家鎮·乃襲騎都尉世職·晚歲聚筆塞外·乾乾著書·留心邊政·良足多焉·是書凡六卷·卷一疆域·卷二建置·卷三職官·卷四貢賦·卷五兵防·卷六叢錄·於分界之得失·兵屯之緩急·旗屯之難移·財用之實耗·推論甚詳·亦經世致用之作也·江省於道光以前·尚有西清外記粗紀崖略·道光以後·則向無專著·是書成於光緒間·實足承續外紀焉

黑龍江鄉土錄一冊

民國十五年印本

民國十五年·郭克興撰·克興字起衰·黑龍江省訥河人·是書抄輯正史官書名著凡八十種·各依史料之性質·分爲篇章·第一篇方輿志釋名·沿革總論龍江道·綏蘭道·黑河道·呼倫道六章·第二篇部族志總論·達呼爾·索倫·鄂倫春·錫伯·卦勒察·巴爾虎·畢拉爾·額魯特·他賚·兀良哈·札薩克圖·滿洲·蒙古·漢軍·回民·通古斯·呼爾喀·費牙喀·領族考略·姓名考略·十九章·凡二篇·二十有五章·名曰黑龍江鄉土錄·一名黑水方輿氏族沿革志·蓋師滿洲源流考之例也·達呼爾索倫二部·俄人著述甚詳·而我國策籍類多因緣附會·不得體要·是書援引諸說·甄別異同·頗見端倪·然如程廷恒誤作張廷恒·已不免疏忽矣·而托火羅答不也·又誤爲達呼爾之異譯·不知托火羅即吐火羅·新唐西域有傳·答不也金史中是人名·與江省土著之達呼爾人·毫不相干耳·

呼蘭府志十二卷

黑龍江軍用被服廠印本